

Tuesday, July 7, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



ALL PARTY MEETING

Mizorama Political Party te chuan Special Intensive Revision (SIR), 2026 Draft Roll tlangzarh tâka voter belh leh paih chungchangah dan dik chiah loa electoral roll-a luh tumte dang tura lungrual taka thawhho an rel.

Vawiina Adviser to CM Pu Lalmuanpuia Punte kaihhruaia All Political Party Meeting New Capital Complex-a Civil Secretariat Conference Hall-a neihah he thu hi an rel a, meeting-ah hian political party tinte chu an aiawh mi 3 aia tam lo theuh tel tura sawm an ni.

Vawiina All Political Party Meeting Aizawl thukhawm chuan SIR, 2026 Draft Roll tlangzarh tâka voter belh leh paih chungchanga hmalak dan turte ngaihtuahin, hmun danga pem tawh si, electoral roll-a la delete loh mi 13,978 an lo awm te, electoral roll-a chuang nawn mi 2,248 an awmte chuan ngaihtuahna a tih thui thu an sawi a; Electoral roll dik leh felfai tak neih a nih theih nan leh India khua leh tui dik tak chauh electoral roll-a an chuàn theihna tura thawktute tawiawm leh lungrual taka hmalakho ni se, an ti.

Tuna an tih theih ber tura lang chu SIR 2026 Draft Roll lo chhuaktaah khan BLO-ten kum 2005 leh 2025 e-roll mapping an tih laia 2025 e-roll a chuang si, 2005 e-roll-a zawmpui an neih tir theih loh category-a an dah, ERO-te ruahmannaa hearing neih ngei ngei turah hian Political party-te hian hearing neihnaah hian party aiawh tel vek tur leh dik taka tang ngam theuh tura in fuih ni se, an ti a; NGO-te thu ngaichang chung zela thawhhona tha neia, chu'nga dan dik chiah loa e-roll-a luh tumte chu dang vek tura hmalak tha an ti bawk.

Vawiin Meeting-a tarlan anih danin, kumin SIR-ah hian Enumeration Form sem chhuah nuai 8 sing 7, sang 5 leh 68 a nih laiin Enumeration Form lak khawm hi

nuai 8, sing 2, sang 8,906 a ni a, Enumeration Form lak let theih loh 6,162 a awm a, chhan hrang hrang avanga enumeration form lak theih lohte chu - boral tawh mi 21,295, awmna chin hriat loh mi 8,333, hmun danga pem mi 13,978 , roll-a thun tawh mi 2,248 leh chhan dang vanga lak theih loh 309 an awm a ni.



ZPM THALAI

ZPM Thalai chuan Directorate of Economics & Statistics building chu ZPM sorkarin thuam tha lo se chuan tlusawp thei a nih thu leh a sak hna thawktu NECS chu an phu tawka hrem ngei ni se an duh thu an sawi.

ZPM Thalai hruaitute hian vawiin khan Aizawl Press Club-ah thuthar thehdarhtute an kawm a, ZPM Thalai vice president Pu Issac Lallungawia Rokhum chuan, Mizoram State Project Minitoring Committee-in Economic & Statistics Directorate building khi nasa an zirchianna report atanga a lan danin, building sak dan chungchangah finfiahna nen thil dik lo tam tak hmuh chhuah a nih thu Monitoring Committee hian an tarlang a, building satu contractor NECS chu dan anga hrem turin sorkar an ngen tawh, tih a sawi.

Pu Isaac Lallungawia chuan, hna tha lo leh eirukna te do zel an tum thu sawiin, Directorate of Economics & Statistics building satu NECS, Pu Robert Romawia Royte hna chhia avanga siamthat nan a tisualtu ni lo ZPM sorkarin cheng vbc 2, nuai 1, sing 3 leh 637 a seng chu tlawmthlak an tih thu leh a tisualtu hi a phu tawk hremna pek ngei ni se an duh thu a sawi bawk.

(Johnny CORR)



LALDENG

MNF Founder President Pu Laldenga thihcham vawi 36-na pualin, Aizawla a thlan Treasury Square-ah MNF Party hruaihawtin sunna hun hman a ni a. MNF President, Pu Zoramthanga hovin MNF hruaitu thahnem tak leh chhungkaw lam ten zahna pangpar an dah a ni.

MNF President Pu Zoramthanga, Chief Minister hlui chuan thusawiin, Inremna hlawhtling ber leh ram zalen ber hlawhchhuah puitu, hnam hmangaihna chi Zofate thilunga tuhtu, Pu Laldenga chuan hriatreng a phu a. A thihcham a lo thlen hian zahna chibai an buk nawn leh a ti. Hnamdangten Pu Laldenga hova remna hlawhtling neih chu an awt a, vannei an ti hle tih sawiin, thangtharten zalenna an vawngnim zel tur a ni," a ti.

Chhungkaw aiawha thusawitu, Pu Laldenga fanu, Dr. Reenee Lalrinzuali MNF Gen. Secy ni bawk chuan, Pathian ringtute tan, Amah Pathian leh mahni ram neihchhun tana ke pen chu a inhmeh hle a ti a. Hnam tana nunna hlantu zawng

zawngte an zahawm takzet a, zahna an hlan tih sawiin, a pa thihcham puala hun hmangtu zawng zawngte chungah lawmthu a sawi bawk.

He hun hi MNF Treasurer Pu Lalruatkima chuan a kaihruai a ni.

Pu Laldenga hi kum 1927 July 11 khan Lunglei Pukpui khuaah a lo piang a, kum 1944-ah British Indian Army zawmin Kum 1959-ah Mizo National Famine Front chu a hova din niin, chu pawl chu October 22, 1961-ah Mizo National Front (MNF) tiin thlak a ni.

Kum 1966 March ni 1 ah zalenna sual tanin, Thalai rual tam tak te nen kum 20 chhung zalenna an sual hnuin mizo mipui, kohhran leh tlawngai pawl, zirlai pawl leh political party hrang hrangte ngenna avangin, June 30, 1986 ah India sorkar nen Remna Thuthlung an zia fel a, state puitling nih hnua Mizoram Chief Minister hmasa ber a ni.

Kum 1990 khan Memorial Sloan Kettering Cancer Centre New York, USA ah thla 3 a awm hnuah kum 1990 July ni 7 a thi a, Aizawla lak niin July ni 13 ah State Funeral pein sawrkar chawimawina famkim nen vuiliam a ni.

